

江蘇省立蘇州圖書館
吳中文獻小叢書之十二

蟋蟀在堂
艸

序

明鄉賢顧青霞先生以畫名當代所著畫引佩文齋書畫譜有引及者金針度人至今學者誦之惟其繪事殆不多作當時寸巒尺壑得者至護爲百結木難三百年來流傳者更鮮矣志稱先生於古今典籍無所不窺獨其詩文抒情之作未之前觀癸酉春偶得詩瘦閣刊畫引後附蟋蟀在堂艸一卷原書單闌八行行十八字按丁氏善本書室藏書志有吳郡顧凝遠詩瘦閣崇禎乙亥仿宋刻晁先生雞肋集知此爲同時家刊本也畫引之卷二爲游紀雜紀白門洞庭武陵諸勝展痕讀其文跌宕瑰異其胸中璀璨氣象如珠在淵自不能斂而此編冰性雲情雋辭古調寄慨遙深多得詩人立言之旨陳玉敘畫引云畫卽不足盡顧子而顧子何必不以畫傳知先生慮其詩文之爲畫掩也畫引三卷本余旣以刊諸畫苑祕笈二編矣徐子乃以此編收入吳中文獻小叢書藉廣其

蟋蟀在堂 序

二

傳以傳先生之所欲傳者其意視余抑又遠矣歆厥既竟謹爲之序己卯歲暮
鄉後學吳詩初敘於麤畫引室

蟋蟀在堂卅一卷

吳郡 顧凝遠著

集學圃草堂看燈

殘雪置道左。餘輝落日邊。東風峭以急。磨成新雪天。客從燈市來。具道春芳妍。累欲策雙趾。閉門將肆筵。止酒涼肺渴。齋期捐衆羶。兩者盡許可。主人斯見賢。宴罷街月黑。鳴屐衝路煙。方歸繩床上。微參宗乘禪。

書銘心庵重開金井募冊後

佛憫衆生化。彌空蕩飛塵。布一袈裟地。沉冥還其真。寶幢靜封樹。轆轤時轉輪。彈指百千劫。泉壤渾羣身。曩者鼎足峙。易地奮勸新。願言捐恩讎。識與不識親。三生未離得。疇能越斯域。設舉念來茲。仁者心惻惻。導以淨土歸。浮圖轟然植。甯免狐兔營。僉曰衆香國。

過金井庵

不到裁踰夏。香廚頓寂寥。地寒摧壽骨。方外忌才翹。世譜庭前樹。遺文紙半條。所嗟相識盡。局鑰白雲遙。

歲莫山行書事

夙興促犂穡。城隅繁繁霜。碎語聞婦子。袖手謝前行。附郭路修阻。衝帆逆余傍。左撫九龍脊。右扼橫山吭。殘雪在其上。薄日流寒光。蕭條松杉鳴。丘墟集羣羊。邨居罕人跡。鍛者聲錚鏘。宛轉循枯叢。短日先晝黃。

一水靜而束。衆山次迎將。憶昔來春初。古梅當路香。載弄湖湄波。桃李瀾微茫。豈期茲冬窮。奉贄心皇皇。中有隱君子。好道乃孤藏。窮窳不可卽。因依佇寒荒。雞犬護深夜。皎月同更長。精誠感門鑰。委曲詞則詳。論交典刑在。了無異存亡。悵然返故道。瞻雲暨吾鄉。前跪告先子。臨穴增悲傷。金石曾足恃。永言思不忘。先慈棄余四十餘年。始與先君合葬。除夕元旦留宿墓側。監視築土。抔土今宵痛未乾。懷椒奠桂泯闌干。長更坐向枯苦苦。短榻眠同衆役寒。霜下杵聲金石重。凍餘人氣壁燈殘。披衣屢起臨深穴。政恐幽冥寢不安。

其二

幽明改歲總斯晨。土窟相依夢寐真。告與今朝爲甲戌。裁過人日是新春。方知四十餘年別。更敍家常舊事親。恨我不聞泉下語。衰時應念藐孤頻。

晏坐墓次

世俗尙元日。振衣人事新。茲來荒丘宿。起坐惟此身。瀰瀰中田雨。危橋三四隣。草木潤眉宇。細水生魚鱗。深泥護屐齒。孤望無議論。爰有前邨民。長揖當嘉賓。兩手奉茗碗。饒棗連栗榛。啜之味甘美。稱謝衷主臣。食頃風頓急。雨挾濃霧傾。涼衣閉矮屋。濁酒能貯春。簷畔橫疎梅。嫩蕊含珠璣。假使雨成雪。光景尤一新。取醉亦易易。興淺不數巡。藉此晝方促。繩床多積薪。晨昏竟何辦。偃仰惟屈伸。

新年苦雨

對此朝朝霧。花開不似春。久湮芳草路。思見隔年人。饑鳥探簷食。醒蟲負宿塵。暗窗風更急。夢斷雨聲頻。

喜晴

天亦厭久雨。重雲力自移。春從鸞語長。日傍草生遲。奔悅看燈市。蒼黃避馬馳。非關人好事。不忍負佳時。

書事

譚隱林過訪

雨中人事日因循。月色過圓整頓春。薄酒熱傾裁見性。破燈重補勝求新。候門老僕驚官長。衣褐卑躬道主臣。欲訊寒河諸伯仲。爲君初拂一床塵。

待月

可恠東崗樹。中宵礙月圓。桂香巾角影。免浴酒中天。水閣明初動。沙鷗白未全。移床看不足。何忍背君眠。

中秋病起

偃臥忽徂暑。不良遍筋骨。聞風駭戎馬。叩首畏林樾。眷懷秋初分。中夜羣籟歇。更衣下重塔。帶雨見明月。明月掛雨外。雨絲綠垂髮。或如噴珠璣。坐冷濕鞵襪。頃之雲四散。正白兩松闕。笑語影生姿。啣杯口徐滑。藥物竟無勳。聽君誦七發。

易水韓張甫太史過訪時余病足

竹風吹戶履聲俱。乍起逢迎強自扶。嘉客憐貧先戒殺。山廚如水僅伊蒲。卑棲斯世珍藏少。博物如君典確無。他日名山求太史。書中金石手親摹。

著勝亭新栽小松卽遇微雨主人命坐客分賦

院小不多植。一松安可無。畏風吹弱幹。喜雨潤青鬚。影散空廓淺。清分衆草殊。他時良讌會。千尺撫危株。

歲莫過周安期齋拜其尊人閱恭肅公畫安仁安石同酌竟日

假蹇如蠡蠶。端居深閉戶。優游州里門。未涉松陵路。暗子同所遭。室虛綦縞婦。七情無損傷。借此覓良語。霜夜凌宵濤。舴艋畫始度。懽然弟兄接。衷言敢微措。尊人八袞餘。堂階善行步。小子願望塵。慰藉夙所慕。印瞻漆點瞳。廬眉齒如瓠。言笑儼妙年。性情無少忤。因推而上之。恭肅圖絹素。再拜然後觀。鄭重逾寶璐。遠超勝國蹤。近逢啓南姪。游戲六法空。可愛尤可怖。三兄得其傳。迅掃出雲霧。以我陳芻蕘。家法金湯固。妙理只尋常。毋爲傷巧誤。旣醉落日黃。留連語無數。囑我出江城。中途慎勿住。續夢不復知。板桐風特注。叩門停櫓聲。明月在高樹。

閒居治圃

清磬隔溪水。溪深居寂如。心無牽外物。身只在前墀。午夢刻期至。棋聲閒話餘。雨過堪藝植。無事簡方書。

偶與園丁話。因知拙劣多。火耕栽薤草。水畜必妨荷。凡樹清其下。幽花喜在阿。翠微無定色。何待壁援蘿。

其三

試取精神爽。無如午夢回。簾低香不散。枝動鳥曾來。葉嫩冬青換。花妍月計開。物華聊自玩。何必與人諧。

黃德操過訪時年七袞其子方週賦此爲壽

從事德公晚。今當信老成。數傳純佛性。一箸釋羣生。鶴骨壽難算。兒籃物更英。自今弃世者。公姓亦爲麟。

余五十五年未嘗病店一病幾死適內子長逝不及永訣爲恨作悼亡

四章

爾死能毋痛。猶憐死及時。作家俱不善。敝廈正難支。蚤歲無思算。衰年定數奇。空將枯眼淚。獨向病衾垂。

其二

弱歲如兄妹。窮愁計百回。頌賢非乏德。居耦或相猜。課爲晨昏苦。貧因布施催。假令終黽勉。未必遽先摧。

其三

哭父裁三白。吞聲又哭妻。艱難叢老境。負載莫同棲。爾養雛成翼。吾懷穀未鷄。此生如脫兔。不復念孤嫠。

其四

相卿骨法壽。寒薄我當先。我在心先死。卿亡火自然。西方不無否。古處偶應然。此後堪相釋。毋留未了緣。

譚友夏遠韻從伊弟德清尹服膺署中還過訪留憩翌日同元歎輩送別

虎丘

燕市一揮涕。十年遯魚鴻。賤子老僚臧。哀然君楚雄。雁行凌青雲。冀北羣閑空。冠蓋道相望。順流江淮東。非是君不來。盼睐吾皆紅。忽由下箸秋。故人舟楫同。開軒接顏色。渥赭英姿豐。索我丘中屋。低簷掩樸櫟。別緒釋春冰。穿林路皆熟。出所舊題識。淋漓盈短軸。君曰有倪迂。未須余信宿。余曰賴君題。三人媚幽獨。坐愛小屋佳。臂指自方幅。結搆寒河旁。歸時同夜讀。期各日淹留。風帆促何速。攜手上青丘。霏微霜滿目。弟病不能隨。諸君過射瀆。想望長安門。豈弟學干祿。悽惻別離難。此心仍反覆。

冬日沈壁甫徐無減及同社諸兄過訪池上小集明發壁甫惠詩作此呈

教壁甫住南城

壁衣初掛蚤寒催。衣畔瓶花浸古梅。恰與高寒文士坐。又逢雪潔美人來。廿年意氣猶風發。何物英奇近日推。折得剡溪藤一幅。城南春色又先開。

韓將軍傳書贈摠戎某

元狩維皇赫厥聲。單于影響卽相驚。綺衣省批聊爲餌。葷粥屯頭已作鯨。司馬戎車十四萬。諸軍敢任悉時名。剡姚不死長平在。盡日空聞哭遠征。

其二

弓劍何爭誦讀難。漢庭人物尙桓桓。將軍貴本他侯種。天子親因幸姊歡。寵冠勿如甥去病。門衰剩有客任安。起家大抵皆公等。并識鉗徒眼不酸。

與錢山人

奪席談鋒擲莫過。忽如學道忽如譌。聽君妙語能消食。只恐君知語不多。

近况

官逋無日不纏綿。安得閒身竟灑然。小飯竹窗尋夢候。閉門風雨染髭天。忍裁鹿帖新償債。剩有魚爐未續煙。柳外又停書畫舫。誰憐心事弗如前。

初冬展墓

不禁秋思動維桑。幾曲寒波去路長。負土報恩無盡日。臨風垂涕又三霜。紙錢掛樹飛紅葉。椒酒傾泉澣石羊。回首夕陽舟影疾。背人啼鳥集林忙。

避暑

畏炎不復憶離羣。幽夢新題對此君。虹日氣驕憑雨判。芰蘭香渾倩風分。酒酣晞髮扶藤枕。浴罷持竿曬葛巾。正是晚涼無一事。忽聞輸餉又紛紜。

過膠山安氏齋遇無曠

握手長千里。秋風吹二難。曾期濯翻去。蹉跎空自歎。撫時交久息。姓名恆變匿。豪髮殊舊觀。怪君雙眼疾。坐客爭就看。一笑廉其實。立沃我巨觥。遮留惟恐失。森陳古法物。明鐙散細帙。欲別詎忍言。輕舟夢中逸。戲書一老農扇。是年秋旱。

力田勿用選高低。人力天工約不齊。懷儂只愁秋甲雨。教兒莫種救公饑。登稻名含辛聽主秤新穀。袖手看鄰聘小妻。止有黃頭孫十歲。賃人耕作日隨犁。

景陵譚服膺劉同人與燕中于司直作六賣詩寄題與徐元歎命同社周安期陳玉立劉虛受周云治衍門僧共賦與前刻不同

賣劍

烈士遭窮暮。空憐佩服孤。不平多負義。必報有捐軀。屢拭芙蓉鏢。時探彈璫娛。知心推季札。高價媿徐夫。賣衣

賣貂帽

久客儀容敝。欬欬濕故袍。經新憐婦慧。被褐避名高。一旦奇溫去。方知揜手勞。回思年少日。惆悵五陵豪。賦命應涼薄。今爲秦子頭。彈冠不復覩。續尾更堪羞。酒盡裘同典。霜侵鬢易秋。祇宜巾蓋杵。賣子賤無謀。

賣書

窗下周旋久。宜公學者看。不須存善本。毋使踧居難。果腹夸能曬。文心粥不還。卯金人士少。太乙杖藜寒。

賣鏡

肝膽向誰照。與君無背時。一朝行色闇。千載晤言岐。明月烘邊近。清輝客裏移。願他常拂拭。遙見素娥姿。

賣筆履

文通才有盡。季友食無資。莫比曹孟德。分香兼買絲。亦非班定遠。壯志欲驅馳。太息勞薪苦。無聊始極思。

觀士人習射

天子臨朝罵腐儒。及今猶自守詩書。巾衫馬上羞驕虜。誦讀聲中罕健兒。詔下茂才先較獵。令申澤國尙驅馳。後生可畏多虓虎。道學堪憎盡伏雌。大候四張游矢亂。旅行雜出辨途危。弓人利往牛膠貴。筆賈窮途兔穎遲。忍痛側身求臂轉。挽強努力計鈞差。閉關密對團欒草。失事精工縱送規。江海宴安憂酖毒。書生尖小變熊羆。從今馬上得之耳。安用叔孫通作師。

望雨

江天一碧水雲稀。望到清明雨沒磯。乍點綠堦苔小潤。又穿紅藥月痕微。輕雷正恐驚兒穉。薄冷仍催着繭衣。不是鴉鳩能妄語。喚人起蚤看春暉。

春日同社野酌

花候東城有伴尋。團圓藉草趁新陰。春愁未減因風絮。野色空憐布地金。矯翼輕鷗波不動。放青逸馬聲難禁。相看吾輩連鷄似。聚散紛紛只隔林。

其二

聊舒醉眼曲岡頭。風蝶翩翻見冶遊。鬚尾插花伴避老。掌中擎菓戲藏憂。登城遠堦依人徙。渡水輕雲合影流。春色自今分管領。不教隴麥竟成秋。

其三

小步青林漏日黃。妙年襟帶御風長。紅粧一院春深鎖。香逕無人草自芳。在野諸君多未識。偶成榆社勿相忘。總然明發春將去。更有森陰覆醉涼。

宿虎丘卽蘇樓遲同社

綠淨春林照眼鮮。丘中掃榻我來先。霧濃滴葉疑朝雨。風緩開煙見曉天。草閣險同孤鳥宿。石崖危挾老僧緣。城中人住偏多懶。向午空山正寂然。

爲慧日題雪艇

一葦高寄海峯頭。搖曳寒風疊浪浮。中有比丘翻貝葉。更無錢笠下魚鉤。空諸我相迎朝貺。定後心非不

繫舟。試爲小師微轉語。資清乘氣欲西流。

佛日同劉石君陸雨生登海虞北山及東皋有懷作

果有仙源近可通。板橋石岸草青蔥。尋芳不覺山城遠。避雨紛來簾樹叢。佛示降辰皈海衆。春淹閨月醉花叢。耿然欲覓滄洲路。爲詢披裘把釣翁。

其二

雪冑長條舞不休。山容水色靜如秋。游魚悵快潮淤浦。歸燕咨諏畫掩樓。簾外數聲紅藥雨。門前一葉木蘭舟。知君夢穩春江月。更憶柴桑菊滿頭。

集趺影齋

一塵無集處。香草蔚盈闌。竹配主人瘦。齋如方丈寒。對僧兼有髮。煮水更傳餐。此夕空塔月。秋聲落葉殘。

再集

近日披帷見。知君兼愛深。多方求自古。位物悉如心。客到先參佛。衣香始入林。今宵明月倍。度曲出松陰。

（詩云自古在昔）

苦役

昔日稱門第。卑微類僕夫。貽清斯拙宦。攝白不成儒。彈鋏難糊口。爲農僅剝膚。有男雖則五。可否未如何。

臥病

孱軀絨戶牖。如嬰負母腹。良辰寘諸懷。適意罕其目。微風撼金鋪。聲聞慘幽獨。內視睫不交。察形衰始縮。揣摩盡醫理。最苦嘗草木。齷齪感羊鵠。悲歌歎賈齔。人生總如斯。何爲壽者族。

其二

深靜思其繇。衆苦集何驟。應用日空虛。外物射微腠。少年笑老人。終不類爾舊。今爲羣少年。還笑踵其後。詢之貌相熟。眊焉昧肥瘦。獨此鏡不欺。忘諱所畢奏。一攬心惻然。惜乎天我厚。賢達任元化。曷嘗吝所受。消息本自如。莫緩須臾候。

其三

昔喜飲良醪。茲唇不沾濕。昔喜彈素琴。茲晨暗塵集。學書腕欲脫。數之未盈十。一床恣相親。薄衲絮重襲。室廬風雨偕。安能久悒悒。尙想寥廓人。命我遺世立。雲霞以爲衣。元氣以爲粒。旣謝羸軀勞。常辭羣動熱。奈何有無間。徘徊翼終戢。

其四

聞見庶已盡。悲樂略不休。無暇問古人。吾輩存幾否。疇曩麗簪綬。朝焉沒首丘。褐帛獨我衣。暫以貧賤留。天猶未少恕。憂患與疾糾。十旬九顛躓。諸笑含苑愁。生平所愛弄。見之等仇讎。但覺天地窄。物類森戈矛。

安得騁逸足。汗漫長遨遊。

病起逢誕小酌

一徑苔莓掃碧錢。葵榴燦發草堂筵。白浮糟裏菖蒲脆。光汎黃中琥珀然。錄事莫寬觥賞罰。彈文尤禁客
鼾眠。勝情自是輸年少。躍躑無妨作意偏。

謝趺影齋折贈虞美人花

數朵枝頭小。香隨東密題。病常悲楚些。喜忽視虞兮。貯水沾啼血。迎風散舞衣。帳中君最寵。何幸手分攜。

夢別 元微之倡題

別時疑似夢。夢裏別疑真。惟夢不堪別。安能如夢親。似因別乃夢。非夢別無因。頻夢別猶可。多思夢不頻。如真訣別。莫使夢勞神。

其二

生別猶容易。魂交別正難。杳冥同死路。驚悸獨生還。爾去鏡無影。吾心灰未寒。當時雲雨約。曾費幾悲歡。

戲集小名書幼兒扇

佛大羅羅致可思。龍超故自有超時。舒宣弱質憐陶令。養炬驚才比謝兒。桃簡鬼謀爭祕議。蘭成徐體鬪
新詩。封胡羯末名家胄。阿知如何性不移。

雨中黃奉倩子羽載酒見招言謝

百壺頻費兩兄資。鎮日春山夏水涯。菓熟珍珠輕雨摘。楊梅出珍珠塢者最佳酒清桑落隔年治。徐停小舫窺隣舫。密載吳姬訪越姬。此日遠轡無可望。柳煙濃處稍栖遲。

中州學憲呂君子傳卒于官之澠疆友人某聞訃詩以哭之將冀其靈來歸而更自傷林杜之行踴也其辭曰

人生先兄弟。敦好次儕友。自與子論交。兄弟則毋有。弱齡同所師。戲嬉極百醜。頑劣冠常見。明敏覩天授。少壯異室家。無日居不耦。晤附罔間隙。動靜協聲臭。當其甚失意。把臂匿林藪。冰雪一籌紅。寒氈蟄交紐。爾飲我勝飢。弟肥兄代瘦。歎歎當憤激。詈罵成勸誘。擬發天地藏。著述圖不朽。骯髒五十年。造物遽奇偶。子濯凌霄翮。吾爲喪家狗。薄業日以零。外侮日以遘。窮途鮮良籌。蠶黃殫黃口。熟讀匪無書。痛飲匪無酒。眼底云誰思。形影自親舊。念子歷清華。衡文稱其手。抗聲上絳幄。轟雷震童叟。去秋撤試闕。強半初領袖。是時兵燹連。士民十死九。困穀賑乃盡。瘡痍甦抖擻。掩骼整千里。重泉福冥受。中土何太嵩。舍子抑培塿。職此多譴聞。潔微宜最奏。將圍黃金腰。輿服耀俎豆。載馳伊洛遠。心血瀝升斗。比聞膳食少。甯免脾肉走。手書寓深冬。闊絕洵良久。祇恐案牘繁。忘我實則否。訖言何因緣。六月廿四酉。踉蹌訊始真。匍匐豈皇救。鼻縱廣莫風。眼決懸河溜。痛鞭州門頰。奪床素琴剖。追思五年別。生辰齊死候。別緒如麻沸。悲歡億難綵。